

In memoria

Joseph Oduber; Heroe, Pionero y virtuoso di welder a bay laga nos

Pa: Monica Etlien Oduber.



NA 1943 prome cu di Dos Guera Mundial aliadonan a uni p'asina cuminsa cu intento pa por logra libera e continente Europa for di e garan di Hitler. Plan tabata pa inicia cu un atake areo pa despues sigui cu infanteria.

Tabatin mester di fuel areo pa inicia. Lago, e tempo ey e refinaria mas grandi na mundo, tabata produci e fuel importante aki ... pero e sistema di friamento di e refinaria no tabata funciona. E doñonan a laga un memo, declama cu urgencia, circula riba tereno di Lago pa por logra haya un boluntario

cu tabata kier a pone su bida na peliger pa coregi esaki.

E memo a circula pa dos dia largo. Di tres dia ora cu Joe a ripara cu ningun hende a aplica, e, como un di e prome hefe Arubiano a dicidi di tuma e reto y a bisti su trahe di buseo, p'e tempo ey uno inferior y mester a sumergi den profundidad di lama, su so, pa corta 12 bara diki di hero cu a crece cu barnacles y yerba di lama cu tabata stroba e awa flui den e sistema. Manera cu el a cuminsa e tabata bao di atake di shocknan electrico, "multi million minishocks" cu tabata hinke con-

stantemente den delaster parti di su curpa cu tabata tembla di dolor pa 30 minut largo, tog el a logra cu balentia y rapidamente a corta e baranan dos caminda pa por a kita nan pa produccion di fuel areo avansa.

Ora cu ela sali for di awa e por a mira 30 persona cu tabata ancioso pa sa si el a logra, incluyendo e doñonan (3) tur bisti na bachi blanco cu dashi preto, sombre di cabana y sapato preto. Manera cu nan a conoce, cu el a logra, un alegria inmenso a brota den e multitud presente y e doñonan a acerke, dune pabien y a hibe asina mes den un sala na di dos piso, e VIP room, unda nan a ofrece e miho whisky, e miho ciga Cubano,

un bon plato di cuminda y un careitje pa cas den nan auto. El a conta esaki cu lagrima den su wowonan y cu un gemoed yen a realisa den su dolor na cama e risico cu el a tuma e tempo ey. Ora mi a puntre dicon el a haci'e anto? Hisando su shoudernan ariba e di, "Minsa, pa salba bida di hende no!?" Mi a realisa cu e persona aki ta un heroe silencioso paso cu su balentia el a marca e fecha den historia p'e atake areo pa salba bida di hende, si e no a tuma e reto aki lo mester a warda pa logra haya otro persona of e susedido aki no por a pasa nunca mes!

E Joe aki mi no tabata conoce. Paso cu mi tabata na pia di su cama mi a logra tende partinan

interesante di su bida cu e tabata considera como un lucha y ami ta wak e como un maraviya. Den su lucha e tabata crea desaroyonan rond di dje cu tabata ofrece mas hende desaroya nan mes. E tabata un homber grandi aki na Aruba y vooral na San Nicolas na unda bo por a drenta den cierto restaurant y pidi for di menu e plato "Joe Oduber Special"! E semper a keda un hende etico y humilde y nunca a broma cu su logronan pero ... mester duna Cesar loke ta di Cesar.

A entrega e susedido aki p'e por yega na remarca pa haya un condecoracion Real pa su acto di balentia presta den su bida ya prome cu el a fayece y lo ta na su lugar pone un caya na su number tambe, sigur cu si na San Nicolas unda cu el a aporta cu e desaroyo di e economia local fundando ey su Ship Repairs cu tabata trece barconan for rond mundo bin drecha. Aunke mayoria cu a conoce e tempo ey mes no tey mas.

Mi no tabata kier a laga mi tata bay sin publica parti di loke el a logra y no solamente pa Aruba...! Na su honor, in memorium di Joe Oduber.